

INGENIERONAN DI ARUBA A REUNI CU DIPITADO FRANK CROES

ORANJESTAD(AAN)—Recientemente delegadonan di e Sociedad di Ingenieronan di Aruba, SIA, a reuni cu Diputado Frank Croes, cu a pone nan na altura di e ultimo desaroyonan encuan to e situacion na Aruba. E representantenan di SIA a haya

e oportunidad pa expresa nan opinion en relacion cu cierto asuntonan, entre otro Lago.

Tambe SIA a informa señor Frank Croes di e proyectonan cu SIA ta considerando. El a apoya e proyectonan di SIA y a sugeri y recomenda pa

considera consulta cu Banco di Desaroyo y DECO den nan estudio nan di factibilidad y posible financiamiento.

SIA ta duna prioridad na proyectonan di agricultura, energia alternativo, recycling, recreacion y produccion di quimicanan

usando recursonan natural como materia prima. E motibo pa bini cu e tipo di proyectonan aki ta pa haci uso di Arubianonan cu experiencia tecnico y manejo industrial.

SIA ta kere cu un desaroyo di industria diversifica ta lo mihor. Desa-

royo sin limite di Turismo por tin como consecuencia entre otro mas problema relaciona cu droga, criminalidad, etc. E industria aki ta hopi vulnerable, si nos no mantene e producto Aruba bon na un forma cu e no mester wordo bendi.

PORTA PA CHICHO KOCK A HABRI NA COLOMBIA

"Burachi 'n ta conta a pega na Medellin"

ORANJESTAD(AAN)—Ayer anochi Aruba Recording Studio a haya e notificacion for di Medellin cu e disco di Chicho Kock, e tumba di aña di carnaval "Burachi 'N ta conta" a pega na Medellin.

E disco a ser manda Medellin pa carnaval di aya wordo toca na varios emisora. Intencion tabata pa haci un traduccion na spaño, pero como cu e tempo pa haci esaki ta corto, e compania disquero a dicidi di acepta e version na papiamento mes, y a lanza esaki como prueba.

A resulta cu ayera henter dia peticionnan tabata

drenta na varios emisora pa repeticion di Burachi 'N ta conta" y ta ser anticipa caba cu e disco aki lo por bira un di e exitonan grandi di carnaval di Medellin e aña aki.

Cu esaki naturalmente mester manda un felicitacion pa Chicho Kock y tambe pa integrantenan di TIME, y sperando di tende mas bon informacion for di exterior ariba e grabacion aki.

For di Barranquilla tambe a dreña peticion pa e disco ey ser manda pa emisorean, y segun e informacionnan si e Burachi aki pega na Barranquilla, esaki lo ta e exito di mas grandi cu lo por

tin pa e temporada aki eynan, ya cu Barranquilla ta e ciudad di Carnaval di Colombia.

E porta cu a ser habri na Medellin, lo por ta e paso grandi internacional pa Chicho Kock e aña aki,

ya cu for di aki, por cuminsa dreña e ofertanan grandi pa diferente ciudad na Colombia tambe.

ALM TA RECUPERANDO POCO POCO

ORANJESTAD(AAN)—ALM a transporta durante luna di januari 11 por ciento mas pasahero compara cu januari 1984.

Esa i ta segun informacionnan cu DIARIO por a haya ayera tardi. E aumento aki ta significa un aumento di 5 por ciento di entrada compara cu januari 1984.

Factornan cu a contribui na esaki ta cu den luna di januari ariba e ruta di Curacao pa Miami, transportacion di pasahero a aumenta cu 40 por ciento compara cu januari aña pasa. Ademas, ALM ta transporta tambe pasaheronan procedente di Brazil for di Caracas pa Miami y esaki tambe a contribui na e aumento di pasahero.

ALM tin un acuerdo cu e compania Brasileño Vasp, cu ta transporta pasahero di Brazil pa Caracas, y ALM ta transporta e pasaheronan despues pa Miami.

Promocion agresivo di ALM na Miami tambe a haci cu tin e aumento di 5000 pasahero transporta compara cu januari aña pasa.

E cifranan a i ta duna un indicacion cu e compania ta recuperando di su crisis financiero cu a cuminsa na aña 83 y 84.

Manera ta conoci, den e aña fiscal di maart 84 pa maart 85 ALM a calcula cu su perdida lo ta 12 millon florin pero tin indicacion cu e perdida aki lo bira algo menos si e desarollonan den e compania sigui manera e ta bayendo actualmente.

BETICO CROES A CONTESTA PDA

ORANJESTAD(AAN)—Ayer Sr. Betico Croes a contesta e telegram di PDA di diadomingo y a informa e partido cu verdaderamente un ex-diputado a bay back su funcion como hefe interino di cierto departamento, cual funcion e tabata ocupa anteriormente.

Encuan to e funcion di Consehero General, el a splica cu e funcion aki tabata discutibel den e deliberacionnan pa un gobierno nacional. Sinem-

bargo, comoquiera cu e partidonan di oposicion a core pa responsabilidad gubernamental, e gobierno nacional no tabata factibel, segun lider di MEP.

Ariba e pregunta cu si e ta stima Aruba, Sr. Croes a laga sa den su contestacion na Sr. Leonard Berlinki, Osbaldo Croes y Roland Croes, kendenan a firma e telegram, cu pueblo di Aruba tin e prueba palpable cu te hasta su bida el a riska pa

e causa.

"E mes pregunta mi lo kier haci na un di e firmantenan di e telegram di PDA, y miembro di directiva, Sr. Osbaldo Croes, cu na augustus 72 durante e conferencia na Suriname, como lider di PPA a dal nos pueblo un puñal den su lomba, na cual ocasion mi a bando na e conferencia pa bin duna nos digno pueblo di Aruba cuenta di e acontecimentonan", el a finaliza su contestacion bisando.

PARLAMENTO TA REUNI ARIBA APA AWE

ORANJESTAD(AAN)—Awe mainta 8 or ta cuminsa e reunion di Eilandsraad pidi pa fraccion di PPA pa delibera ariba Aruba Ports Authority.

E punto di agenda pa

e reunion aki ta e maneho di Colegio Ehecutivo di Aruba encuan to Aruba Ports Authority en especial, loque ta trata e tarifanan den nos waf como tambe e acontecimentonan di e ultimo simannan den nos waf.